

JESUS 316

Kinsa si Jesus?

Kinsa si Jesus? Ang Biblia naghatag kanato sa tinuoray nga tubag niining pangutanaha. Si Apostol Pablo nagsulat: *“Ang tibuok Kasulatan gisulat uban sa lamdag gikan sa Dios,”* 2 Timoteo 3:16. Ang Biblia nga gilamdagan sa Dios, gikan sa Genesis hangtod sa Gipadayag, nagtudlo kanato nga si Jesus Dios gikan pa sa walay katapusan. Nag-ingon ang Biblia nga Siya *“ang Alpa ug ang Omega,”* nag-ingon ang Ginoong Dios nga *Labing Gamhanan, ang Dios karon, kaniadto ug ang moanhi,”* Gipadayag 1:8. Ang Biblia nagpaila nga si Jesus Dios, ang Magbubuhat, ang Maayong Magbalantay, Ginoo, Manunubos, ang Kordero sa Dios, ang Ginoo sa mga Ginoo, Hari sa mga Hari, Emmanuel (ang Dios naga-uban kanato), Manluluwas, Pangulong Pari ug ang Pagkabanhaw ug ang Kinabuhi.

Si Jesus ang Magbubuhat. *“Sa wala pay nabuhat bisan unsa, ang Pulong diha na. Ang Pulong uban sa Dios ug ang Pulong Dios. Sukad pa gayod sa sinugdan ang Pulong uban sa Dios. Pinaagi kaniya gibuhat sa Dios ang tanan ug walay bisan usa sa tanan nga nabuhat nga dili pinaagi kaniya. Ug ang Pulong nahimong tawo ug mipuyo uban kanamo, puno sa grasya ug kamatuoran. Nakita namo ang iyang himaya, ang himaya nga iyang nadawat ingon nga bugtong Anak sa Amahan,”* mga kinutlo gikan sa Juan 1:1-14. *“Kay pinaagi kaniya gibuhat sa Dios ang tanan nga atua sa langit ug ania sa yuta, makita ug dili makita—mga gahom nga espirituhanon, mga pamunoan, mga hari ug ang tanan nga nagmando. Gibuhat sa Dios ang tanan pinaagi kaniya ug alang kaniya”* (gikan sa Taga-Colosas 1:16-17).

Si Jesus mao ang “Ako mao Ako”. Si Jesus, ang Anghel sa Ginoo, mitawag kang Moises pinaagi sa nagdilaab nga sampinit nga makita sa Exodo 3 (~1,450 B.C) ug nagpaila nga siya ang *“AKO MAO AKO.”* Sa Juan 8, gideklarar ni Jesus ang Iyang kaugalingon nga siya ang *“AKO MAO AKO”* ug anaa na sa wala pa si Abraham (~2,100 B.C) ug ang mga Judio. Sa pagkadungog niini sa mga Judio nga giangkong ni Jesus nga siya Dios, sila mipunit ug mga bato aron Siya mamatay. Ug panghuman niadto, miingon pa si Jesus, *“Ako ug ang Amahan usa ra”* Juan 10:30-31. Mipunit pag-usab ang mga Judio ug mga bato aron Siya batoon.

Si Jesus sa Daang Tugon. Wala pa gayoy tawo nga nakakita sa Dios Amahan, Juan 1:18; 6:46. Ang Dios, isip si Jesus nga anaa na sa wala pa mahimo ang kalibutan, nagpakita na sa pipila ka mga tawo sa panahon sa Daang Tugon sa wala pa Siya nahimugso sa lungsod sa Bethlehem. Siya nagpakita isip Anghel sa Ginoo ngadto kang Hagar sa Genesis 16 ug 21; ngadto kang Moises sa Exodo 3, kang Gideon sa Mga Maghuhukom 6, ug sa ginikanan ni Samson diha sa Mga Maghuhukom 13. Nagpakita usab si Jesus kang Abraham sa Genesis 18 ug 22, ug kay Jacob sa Genesis 31 ug 32. Si Jesus nahisgotan usab nga kauban sa Balaan Trinidad sa Isaias 48:12-19 (nga gisulat niadtong 700 B.C.)

Si Jesus ang Katumanan sa mga Tagna. Adunay sobra sa 300 ka mga panagna sa Daang Tugon nga nasulat ginatos nga katuigan ang milabay, nga naghulagway sa pagkatawo, kinabuhi ug kamatayon ni Jesus. Pipila niadtong mga panagnaa makita sa Mga Salmo 22 nga naghulagway sa makalilisang nga kamatayon ni Jesus didto sa krus (kini gisulat niadtong 1,000 B.C diin ang pagbato mao ang pamaagi sa pagpatay isip silot). Ang katumanan niining mga propesiya sa Mga Salmo 22 makita sa Mateo 27.

Si Jesus ang Dios na Nagpaka-Tawo. Mipropesiya si Propeta Isaias: *“Natawo alang kanato ang usa ka bata; gihatag kanato ang usa ka anak nga lalaki,”* (Isaias 9:6). Giila ni Isaias nga ang Bata mao ang Gamhanang Dios. Si Jesus sa wala pa Siya matawo, anaa na. Ang titulo nga *“Anak sa Dios”* nagpakita sa Iyang katungdanan ug dili sa Iyang pagpakatawo. Wala kini nagpasabot nga Siya nabuhi sugod niadtong natawo siya sa Bethlehem. Si Apostol Pablo nagsulat, *“Angay ninyong batonan ang hunahuna nga gibatonan ni Cristo Jesus nga mao kini: Bisan siya Dios, wala siya mamugos nga magpabiling tupong sa Dios. Hinuon, sa iyang kaugalingong kabubut-on, gibiyaan niya kining iyang kautungod ug nahumong usa ka ulipon. Natawo siya sama sa kasagarang tawo; Nagpaubos siya ug nagmasinugtanon hangtod sa kamatayon—bisan sa iyang kamatayon sa krus,”* Taga-Filipos 2:5-8. Si Jesus nahimong hingpit nga tawo samtang Siya nagpabiling hingpit nga Dios. Ang kanunay nga anaa nga si Jesus, mikunsad gikan sa Langit, aron magpakatawo (Juan 3:13, 31; Juan 6:33-38). Si Jesus nga Dios ug tawo.

Si Jesus mibuhat ug mga Milagro. Kadaghanan sa Iyang mga milagro makita sa Bag-ong Tugon. Tulo sa Iyang mga nabuhat nga milagro ang tataw nga nagpamatuod kon kinsa Siya. Gipakaon Niya sa kahibulongan nga paagi ang 5,000 ka tawo ug, pagkahuman, Siya miingon, *“Ako mao ang pan nga naghatag sa kinabuhi,”* Juan 6:35. Giayo Niya ang usa ka buta ug human nga Siya miingon, *“Samtang ania pa ako sa kalibotan, ako ang kahayag sa kalibotan,”* Juan 9:1-8. Ug unya Siya miingon, *“Ako mao ang pagkabanhaw ug ang kinabuhi. Ang nagtuo kanako, bisan tuod mamatay, mabuhi”* (Juan 11:25). Pagkahuman niini, si Jesus miadto sa lubnganan ni Lazarus nga Iyang higala nga upat na ka adlaw ang nakalabay gikan nga namatay. Iyang gitawag si Lazarus aron mabuhi pag-usab. Giayo usab ni Jesus ang mga masakiton, ang mga paralitiko, mga bungol, amang, mga sanlahon ug mga gisuldan sa daotang espiritu. Iyang gihimo ang tubig nga vino, milakaw sa dagat, ug gipahunong ang kusog nga unos. Dugang pa niini, gisaysay sa Mateo 9:2-7 ang pagdala sa usa ka lalaking paralitiko ngadto kang Jesus.

Ug Siya miingon sa lalaki, *"Anak, ayaw kabalaka kay gipasaylo na ang imong mga sala."* Gihunahuna sa mga lider sa relihiyon nga ang gisulti ni Jesus usa ka pagpasipala tungod kay ang Dios lang ang adunay katungod nga makapasaylo sa mga sala. Apan sila gipangutana ni Jesus, *"Hain may sayon isulti, 'Gipasaylo na ang imong mga sala' o 'Bangon ug lakaw'? Karon ipakita ko kaninyo nga ang Anak sa Tawo may gahom dinhi sa yuta sa pagpasaylo sa mga sala."* Busa miingon siya sa paralitiko, *"Bangon, dad-a ang imong gihigdaan ug pauli sa inyo!"* Ug mibangon ang paralitiko ug mipauli."

Gipamatud-an ni Jesus nga Siya Dios. Natuman ni Jesus ang mga propesiya mahitungod sa Iyang pagpakatawo, kinabuhi ug kamatayon. Siya nakahimo ug daghang mga milagro nga nagpamatuod nga Siya Dios. Siya nagtudlo nga adunay awtoridad. *"Sa pagkahuman ni Jesus ug sulti niining mga butanga, ang mga tawo natingala sa iyang pagtulon-an. Lahi siya sa ilang mga magtutudlo sa Balaod kay ang iyang pagtudlo inubanan man sa awtoridad"* (Mateo 7:28-29). Ug Siya nagkinabuhing putli ug walay sala (Mga Hebreo 4:15; 1 Pedro 2:22; 1 Juan 3:5). Si Jesus nga Dios ug tawo nga walay sila, nahimong hingpit nga Kordero sa Dios nga gihalad didto sa krus alang sa atong mga sala. *"Didto sa krus gidala ni Cristo diha sa iyang lawas ang tanan tang mga sala aron dili na kita magpakasala kondili magkinabuhi na nga matarong"* (1 Pedro 2:24).

Si Jesus gilansang sa krus ug nabanhaw gikan sa mga patay. *"Nasayod kamo nga ang gibayad aron pagluwas kaninyo dili butang nga kawad-an ug bili sama sa salapi o bulawan. Giluwas kamo sa bililhong dugo ni Cristo kinsa, sama sa nating karnero, walay buling o mansa"* 1 Pedro 1:18-19. *"Gipatay siya nila pinaagi sa paglansang kaniya didto sa krus. Apan gibanhaw siya sa Dios sa ikatulo ka adlaw ug gipadayag siya. Naghisgot mahitungod kaniya ang tanang mga propeta nga nag-ingon nga ang tanan nga nagtuo kaniya pasayloon sa ilang mga sala pinaagi sa iyang ngalan"* Gawa 10:39-40. *"Gitudlo ko kaninyo ang akong nadawat nga mahinungdanon kaayo: kini mao nga si Cristo namatay alang sa atong mga sala sumala sa nahisulat sa Kasulatan. Gilubong siya ug sa ikatulo ka adlaw gibanhaw sumala sa nahisulat sa Kasulatan."* 1 Mga Taga-Corinto 15:3-4. Nabanhaw si Jesus gikan sa lubnganan ug kini nakita sa daghang mga saksi sa wala pa Siya mikayab ngadto sa Langit.

Si Jesus ang nag-inusarang dalan ngadto sa Amahan. Miingon si Jesus, *"Ako ang dalan, ang kamatuoran ug ang kinabuhi. Walay makaadto sa Amahan kon dili moagi kanako."* Juan 14:6. Si Apostol Pedro nag-ingon, *"Ang kaluwasan makaplagan lamang diha kaniya kay dinhi sa kalibotan wala nay laing ngalan nga gihatag sa Dios ngadto sa katawhan nga maoy makaluwas kanato,"* Mga Buhat 4:12. Si Apostol Pablo nagsulat, *"Kay may usa lamang ka Dios ug usa lamang ang naghiusa sa Dios ug sa mga tawo. Siya mao ang tawo nga si Cristo Jesus. Gitugyan niya ang iyang kaugalingon aron sa paglukat sa tanang tawo,"* 1 Timoteo 2:5-6. Ang dalan ni Jesus ngadto sa Dios lahi kaayo sa ubang relihiyon. Wala silay ikahatag nga mga solusyon sa atong suliran sa sala. Nagtudlo sila nga kon ikaw magabuhay ug maayo sumala sa ilahang kaugalingon pagsabut sa maayo ug dautan, lagmit kalimtan sa ilang mga dios ang imong mga sala ug pasudlon ka sa Langit. Apan ang dalan ni Jesus lahi gayud kay kini pinaagi sa pagtoo. Ang imong mga sala gibayran na didto sa krus ug napasaylo na. Pinaagi kang Jesus, ikaw makasulod na sa langit nga napasaylo na. *"Kay gihigugma pag-ayo sa Dios ang kalibotan ug tungod niini gihatag niya ang iyang bugtong Anak, aron ang tanan nga motuo kaniya dili malaglag kondili makabaton hinuon sa kinabuhing dayon,"* Juan 3:16.

Si Jesus mobalik pag-usab. *"Ayaw kamog kaguol. Salig kamo sa Dios ug salig usab kanako. Sa balay sa akong Amahan adunay daghang mga lawak ug moadto ako aron pag-andam ug dapit alang kaninyo. Kon dili pa kini tinuod, dili ko unta kamo sultihan niini. Ug kon atua na ako didto ug makaandam nag dapit alang kaninyo, mobalik ako ug kuhaon ko kamo aron bisag asa ako, atua usab kamo."* Juan 14:1-2. Ug sa mga ulahing pulong sa Biblia, si Jesus miingon, *"Mobalik gayod ako sa dili madugay!"* Si Apostol Juan midugang, *"Hinaot pa unta! Dali na, Ginoong Jesus!"* Gipadayag 22:20-21. Kon mobalik si Jesus karon, andam ka na ba aron sa pagsugat Niya? Bisitaha ang www.Gospel316.org aron imong masuta kon andam ka ba gayud; kini pinaagi sa pagtoo kang Jesus ug sa pagdawat sa kapasayloan sa Dios.

Si Jesus Dios gikan sa Hangtod ngadto sa Kahangtoran.

Mahibulong ka sa pagkabalaan sa Iyang Gamhanang ngalan!

Kinsa si Jesus? © 2025 ni John D. Morris III nga gimantala sa Acts One Eight. Aduna kay kagawasan ka pag-print, pagkopya, pag-post, pag-email, o pag-message niini basta dili nimo bag-ohon ang mensahe ug ang tibuok han-ay sa mga pulong. Mahimo nimong idugang ang ngalan ug logo sa inyong buluhaton o simbahan sa unang panid ug idungag ang imong contact information diha sa ibabaw nga linya duol sa ubos sa ikaduhang panid. Ang Jesus316 nabasi sa Biblia lang. Kini namugna aron makatabang sa mga tawo nga makabaton ug pagtoo kang Jesu-Cristo ug unya motubo ingon nga Iyang mga tinun-an. Mahimo pod nga ikaw mo-email sa Acts One Eight (sa Ingles unta) sa: Hello@Mail316.org. Ang mga hinubad sa laing mga pulong nga bersyon tungod ug pinaagi sa www.ChristianLingua.com. *Kinsa si Jesus?* nga basahon adunay 48 ka hinubad sa lain-alang mga pulong ug kini libreng makuha sa www.Jesus316.org. Ang mga bersikulo sa Bibliya sa Ingles nga bersyon gikuha gikan sa New American Standard Bible 1995 sa The Lockman Foundation. Ang mga bersikulo sa Biblia niining mga pinulongan gikuha gikan sa Revised Cebuano Popular Version sa Philippine Bible Society, 2006.